



Bentiaraq Ottosen  
Atassut

UKA 2024/52  
13. november 2024

**Kalaallit illuisa ullumikkut sunik suliaqartarnerannut tunngasumik nalunaarusioqqullugit Naalakkersuisut peqquneqarnissaannik Inatsisartut aaliangiiffigisassaattut siunnersuut. Taassuma saniatigut Kalaallit illuisa siunissami aaqqissuussaannikkut qanoq isikkoqarsinnaanerannut, qanoq akisussaaffeqarnissaannik qanorlu atuuffeqarsinnaanerannut tunngasunik innersuussutinik nalunaarusiaq aamma imaqartinneqassaaq.**

(Inatsisartunut ilaasortaq Peter Olsen, Inuit Ataqatigiit)

Kalaallit Illui Danmarkimiittut ullumikkut qanoq sunillu suliaqartarnerat ilisimalluarpakka, qanimummi suleqatigilluarsimavakka. Taamaattumik suleriusaat ilisimaaralugit oqaatigiinarsinnaavakka, suliat annertusinikooqaat ulluinnarnilu ilinniartunut tunngaanaratik aamma Kalaallit Danmarkimi najugalinnut kiffartuuisarnerat siammarnikooqaq.

Erseqqissarusuppara ilinniartut eqqarsaatiginerullugit sumiiffinni pineqartuni eqqortuummat, ilinniagaqarnerup iluani piffiit ilaasa qaffasissusaat annertunerummata. Soorlu taakkartorneqarsinnaasut tassaapput: K benhavn-imi aamma Aarhus-imi ilinniakkap qaffasissusaa imaluuniit atuartitseriaaseq qaffasissuq atorneqartarpoq, saniatigulli Aalborg-imi aamma Odense-imi ilinniakkap assinganik ingerlatsineq ilinniartitaanikkut appasinnerulaartumik inissisimatinneqartarluni.

Ilinniakkat pineqartut tassaapput Bachelorgraditut imaluuniit kandidatgraditut taavali akademiimi ilinniartunut tunngassutillit, taamaattumik eqqarsartariaqarpugut qanoruna isilluta aaqqissuulluakkamik Kalaallit Illui Danmarkimiittut siunissami ilusiliisoqarnissaannut aqutissiutissallugit.

Ilinniartut nammineerlutik toqqartarpaat sumi ilinniakkamik aallartissanerlutik, tamanna nammineerlutik kiffaangissuseqarfigisarpaat. Kisiat ajornannginnerusoq inummut nammineerlutik toqqartarpaat, taamaattumik tamanna tapersensorluinnarnissaat siunertaqartuartaqarparput. Kalaallit Illui ullumikkut pitsaanerusumik kiffartuuisarnissaat pingaaruteqaqaaq, tassami ilinniarnermuunaangikkaluartumik allamillu toqqammaveqartumik siunertaqarnissaat aamma ammatittariaqarparput, nutaaliortuarneq pisussaaffiliissaaq periarfissat annertusineranut aqutissiussinissamut.

Taamaattumik uani siunnersuuteqartup isumaa eqqarsaatigalugu pisariaqartilluinnarparput nalunaarsuisoqartariaqartoq, kisianni piumasarineqarsinnaasoq ataasiinaavoq ilinniartitaanikkut inissisimaffik imatut isikkulik qiviarneqarsinnaanera.

Ajornartorsiulli ataaseq saqqummiutilaassavara Kalaallit Illuat Aalborg-imiittoq neqerooruteqarsinnaanngilaq ilinnialersumut najugaqartitsinissaminut, taamaattumik isumaqarpunga periarfissat eqqarsaatiginerullugit siunissami aqqissuussinikkut tamanna pillugu pilersaarusiortoqarnissaa. Pingaartilluinnarpara ilinniartut periarfissineqarnissaat ukiup affaani imaluuniit ukioq ataaseq neqeroorfigineqarlutik ilinniakkap aallartinneraniit piffissaq atorlugu Kalaallit Illuani najugaqarsinnaanerat, soorlu periarfissaq takuneqarsinnaasoq Aarhus-imi aamma Odense-mi. Taamaattumik Kalaallit Illuat Aalborgimiittoq assersuutitsialtut qiviarneqarsinnaasoq oqaatigisinnaavara.

Allannguutissatut ilassutitulli saqqummiussaqaarpugut:

***“Kalaallit Illuat Aalborg-imiittoq ilinniartunut ilinnialersussanullu najugaqarnissamut neqerooruteqarsinnalersillugu inissinneqarnissaa pillugu Naalakkersuisut peqquneqarnissaannik Inatsisartut aaliangiiffigisassaattut siunnersuut”.***

Allannguutissatut ilassutitulli saqqummiussaqaarnitsinni toqqammavigineqarpo, periarfissat atorneqartariarnerat siunissaq ungasinnerusoq eqqarsaatiginerullugu. Taamatut ilanngussinitsinni ilassutitut oqaluuserineqarnissaa piumasaralugu, taamaattumik isumaqarpugut periarfissat taamatut ittut ammatinneqarnissaat siunertarineqassasoq.

Kalaallit Illui tamaasa nalilersorneqartariaqarput, siunissaq ungasinnerusoq eqqarsaatigalugu periarfissat pingaarnertut toqqammavillit pillugit inatsisitigut sinaakkuteqartariaqarmata. Kalaallit Danmarkimi najugallit illersorneqartariaqartut isumaqarpunga, eqqaamasassaq tassaavoq ilaqutariinnermut politikki tassaassamat sukarsuarni pingaarnerpaaq. Taamaattumik Kalaallit Illui suleqatigilluinnartariaqarpaat, angajoqqaat danmarkimi najugallit. Suleqatigiittariaqarpugut sapinngisamik ilungersorluta danmarkimi suliat meeqqanut arsaarinnittarnermut tunngasut pillugit, tamanna Kalaallit Illuinut aamma atuuttariaqartoq isumaqarpunga. Suleqataasariaqarpoq Kalaallit Illui tamanna Naalakkersuisumut kaamattuutigaara suliasat taamaattut oqumaattorujussuupput, taamaattumik Kalaallit Illui illersuisariaqarnerat pingaaruteqartorujussuuvoq.

Taamatut oqaaseqarluta siunnersuut toqqammaviusoq allannguutissatullu siunnersuuterput pillugu tapersiivugut, ataatsimiititaliami susassaqaartumi suliarineqarnissaa innersuullugu.